



# ACTA DO PLENO DA CORPORACIÓN

## SESIÓN ORDINARIA DO 8 DE NOVEMBRO DE 2018.

### ASISTENTES:

#### Alcalde- Presidente:

José Luis Oujo Pouso (PP)

#### Concelleiros:

Maria José Maneiro Quintáns (PP)

José Manuel Deán Pouso (PP)

Juan Jesús Pérez Santos (PP)

M<sup>a</sup> Magdalena Pérez Millares (PP)

Antonio Romero Ribeiro (PP)

Joaquín García García (PP)

Josefa M<sup>a</sup> Hermo García (PSdG- PSOE)

Luis García Gaciño (PSdG- PSOE)

M<sup>a</sup> Asunción Torres Parada (Portodos)

José Ángel Lorenzo Vila (Portodos)

M<sup>a</sup> Ánxela Franco Pouso (BNG)

David Barrio Alonso (BNG)

#### Secretario:

José Manuel González García.

Na localidade de Porto do Son (A Coruña), sendo as **20:10 horas** do día **8 de novembro de 2018**, no Salón de Actos da Antiga Casa Consistorial, reúne o Pleno da Corporación Municipal en **sesión ordinaria**, previamente convocada, baixo a presidencia do Sr. Alcalde- Presidente, D. José Luis Oujo Pouso, coa asistencia dos Sres. concelleiros que se relacionan á marxe.

A Corporación está asistida polo secretario da Corporación, D. José Manuel González García, que dá fe do acto.

Tamén asiste a interventora do concello, D<sup>a</sup>. M<sup>a</sup> Mar Lirola Delgado.


Unha vez verificada polo secretario a válida constitución do Pleno, dado que se cumpre a asistencia mínima dun terzo do número legal de membros da Corporación, o Alcalde- Presidente abre a sesión.

De seguido o Alcalde- Presidente procede á deliberación e votación dos asuntos incluídos na **ORDE DO DÍA:**

### A) PARTE RESOLUTIVA.

1.- Aprobación de actas de sesions anteriores.

2.- Aprobación de modificacións orzamentarias: transferencia de crédito 20/2018.

- 
- 3.- Convalidación do decreto da Alcaldía núm. 585/2018, do 3 de agosto, de cancelación da garantía definitiva prestada no contrato "Servizo de recadación".
  - 4.- Moción do grupo municipal do BNG sobre o sector eléctrico.
  - 5.- Moción do grupo municipal do BNG en apoio aos traballadores de ALCOA.
  - 6.- Mocións urxentes.

**B) PARTE DE CONTROL.**

- 7.- Dación de conta dos decretos da Alcaldía e das actas da Xunta de Goberno Local.
- 8.- Rogos e preguntas.

\*\*\*\*

## **1. APROBACIÓN DE ACTAS DE SESIÓNS ANTERIORES.**

O Sr. Alcalde- Presidente pregunta se os concelleiros queren facer algunha observación ás actas e, non habendo intervencións, somete a votación a súa aprobación.

O Pleno da Corporación, tras a **votación ordinaria e por sete (7) votos a favor (7 PP) e con seis (6) abstencíons (2 PSdG- PSOE+ 2 Portodos+ 2 BNG)**, polo tanto co **quórum de maioría absoluta**, sendo trece (13) o número legal de membros da Corporación, **APROBA a acta da sesión ordinaria do 20/09/2018.**

## **2. APROBACIÓN DE MODIFICACIÓNS ORZAMENTARIAS: TRANSFERENCIA DE CRÉDITO 20/2018.**

O Sr. secretario dá lectura á proposta da Alcaldía, que é do seguinte teor literal:

### **"PROPOSTA AO PLENO DA CORPORACIÓN**

#### **ASUNTO: Transferencia de crédito número 20.**

José Luis Oujo Pouso, Alcalde – Presidente do Concello de Porto do Son,

Visto que con motivo das amortizacións anticipadas de préstamos existen aforros na aplicación orzamentaria 011.31000 correspondente a xuros bancarios, e considerado que pola contra, existe insuficiencia de crédito na aplicación 934.35900 para fazer frente os gastos financeiros pola xestión de padróns domiciliados, se propón aprobar a seguinte modificación orzamentaria de transferencia de crédito entre distintas áreas económicas por importe de 3.83,92€:

Aplicacións orzamentarias que transfiren crédito:



Programa	Económica	importe	descripción
011	31000	-3.083,92	Xuros bancarios
934	35900	+3.083,92	Outros gastos financeiros
	Total	0,00	

Polo presente,

#### **PROPOÑO AO PLENO DA CORPORACIÓN**

**PRIMEIRO.** - aprobar a modificación orzamentaria transferencia de crédito número 20 por importe de 3.89,92€ co detalle sinalado anteriormente

**SEGUNDO.** -Dar conta do presente acordo á Intervención e Tesourería Municipais.

Porto do son, a 2 de novembro de 2018

O ALCALDE  
Asdo. José Luis Oujo Pouso"

Non habendo intervencións, o Sr. Alcalde- Presidente dá paso á votación da proposta.

O Pleno da Corporación, tras a votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG), polo tanto co quórum de maioria absoluta, sendo trece (13) o número legal de membros da Corporación, **APROBA** a proposta nos seus propios termos.

### **3. CONVALIDACIÓN DO DECRETO DA ALCALDÍA N° 585/2018, DO 3 DE AGOSTO, DE CANCELACIÓN DA GARANTÍA DEFINITIVA PRESTADA NO CONTRATO “SERVIZO DE RECADACIÓN”.**

O Sr. secretario dá lectura á proposta da Alcaldía, que é do seguinte teor literal:

#### **“PROPOSTA AO PLENO DA CORPORACIÓN**

**ASUNTO:** convalidación do decreto número 585 de 03/08/2018 de cancelación de garantía.

José Luis Oujo Pouso, Alcalde- Presidente do Concello de Porto do Son,

No mes de agosto tramitouse a cancelación do aval depositado por Jesús Forneas Teijeiro correspondente ao contrato de servizo de recadación municipal por xestión directa en período voluntario e executivo debido ao tempo transcorrido dende a finalización do mesmo.

O artigo 52 da Lei 39/2015, do 1 de outubro, do procedemento administrativo común das Administracións Públicas permite a convalidación dos actos administrativos polo órgano competente.

Pola presente,

### **PROPOÑO AO PLENO DA CORPORACIÓN**

**PRIMEIRO.-** A convalidación do decreto de Alcaldía 585 de 3 de agosto de 2018.

**SEGUNDO.-**Dar conta do presente acordo á Intervención e Tesourería municipais.

Porto do Son, a 2 de novembro de 2018.

O Alcalde,  
Asdo. José Luis Oujo Pouso"

Dª. Josefa Mª Hermo García sinala que no decreto que se pretende convalidar se indica que "se dará conta no próximo Pleno" e pregunta por que non se tratou este asunto na sesión de setembro.

A Sra. interventora explica que puido ser porque ela estaba de vacacións.

Non habendo mais intervencións, o Sr. Alcalde- Presidente dá paso á votación da proposta.

O Pleno da Corporación, tras a **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quórum de maioria absoluta**, sendo trece (13) o número legal de membros da Corporación, **APROBA a proposta nos seus propios termos**.

## **4. MOCIÓN DO GRUPO MUNICIPAL DO BNG SOBRE O SECTOR ELÉCTRICO.**

Dª. Mª Ánxela Franco Pouso le o texto da moción, que é do seguinte teor literal:

### **"MOCIÓN SOBRE O SECTOR ELÉCTRICO**

#### **EXPOSICIÓN DE MOTIVOS**

O nacionalismo galego defende que a enerxía debe ser entendida como un ben público e a política enerxética debe desenvolverse en base a esta consideración, superando a concepción actual como unha mera mercadoría legalizada polos gobernos centrais de PP e PSOE. Do mesmo xeito, o subministro de enerxía debe ter a concepción de servizo público e o seu acceso debe ser un dereito garantido para todas as persoas por riba dos intereses económicos do oligopolio eléctrico. Porén, na actualidade, o sistema funciona en liñas totalmente contrarias a estes principios, favorecendo un prezo final da enerxía eléctrica imposíbel de soportar para moitos fogares e tamén para o tecido económico e produtivo de Galiza.



Un factor fundamental é que o actual sistema de xeración de prezos é totalmente opaco einxusto. Mediante un mecanismo de poxa o prezo final da electricidade no mercado maiorista vén determinado polo prezo da ultima oferta en ser aceptada. Isto significa que posto que existen tecnoloxías que producen a uns custos moi diferentes, acabe marcando o prezo de forma habitual unha das tecnoloxías más caras. Isto dá como resultado que se xeren os coñecidos no propio sector como "beneficios chovidos do ceo", especialmente no caso de tecnoloxías case ou totalmente amortizadas, como sucede coas hidroeléctricas e a enerxía nuclear. Por poñer un exemplo, no último ano completo (2017) as tres maiores compañías eléctricas que operan no Estado español (Iberdrola, Endesa e a actual Naturgy) obtiveron uns beneficios 5.627 millóns de euros, un 3% máis que no exercicio anterior malia que 2017 foi un ano de seca que impactou de forma negativa en termos hidrolóxicos.

Por outra banda, hai que engadir que a electricidade ten unha fiscalidade absolutamente disparatada e excesiva, o que tamén incrementa o prezo final. Por exemplo, o prezo da electricidade ademais de ter diferentes impostos que se solapan, atópase no tramo mais elevado do IVE, no 21%, sendo un dos más altos de Europa ao tempo que cuestións non básicas como as touradas ou un coche de luxo teñen un gravame menor. A única razón para que o IVE non se reduza é o afán de recadación do Estado.

Cómpre ter en conta tamén que Galiza tivo e ten un papel de produtor de enerxía que non foi escollido polos galegos e galegas, senón que é consecuencia dunha cadea de decisións alleas, moitas delas do período da ditadura franquista, e do que non obtemos compensación. Nesa función imposta de país produtor, xeramos enerxía para o consumo doutros territorios do Estado español, exportando unha media dun 35% de electricidade. Mientras outros territorios aforran os custos do impacto social e ambiental que sufrimos nós, Galiza non obtén ningún beneficio. Isto obedece a un deseño centralista do Estado español que, mentres nos adxudicaba ese papel, reservaba para outros lugares ser o centro da industrialización e do desenvolvemento económico.

Con este modelo, mentres Estado e eléctricas aumentan os seus beneficios e Galiza exporta enerxía, no noso país hai máis de 442.000 persoas que declaran non poder permitirse manter a vivenda cunha temperatura adecuada e a taxa de risco da pobreza incrementou nun 12,15% dende o 2009. Para combater a dificultade que supón o acceso á enerxía non son suficientes nin o bono social do Estado nin ticket eléctrico da Xunta de Galiza, que chegan a unha porcentaxe moi reducida da poboación.

Non é de recibo que por riba de non beneficiármonos de producir, grazas ás políticas enerxéticas do Partido Popular, Galiza vaia pagar a factura máis cara do Estado. A posibilidade de introducir suplementos territoriais na tarifa eléctrica xa figuraba na Lei do Sector Eléctrico do ano 1997 e na vixente de 2013. Porén, foi a aprobación do Real Decreto- lei 20/2012, de 13 de xullo, de medidas para garantir a estabilidade orzamentaria de Rajoy o que converteu o que a Lei recollía como posibilidade en obligatorio para o 2013. Resultado disto as eléctricas recorron e o Tribunal Supremo deulle a razón en distintas sentenzas. Como resultado, vaise repercutir o recadado en varios impostos nas facturas dos galegos e galegas para recadar arredor de 38 millóns de euros. Isto é un absoluto disparate, quen produce paga máis que quen non e as galegas e galegos imos recibir o tarifazo máis grande do Estado.

Desde o BNG defendemos que Galiza ten dereito a controlar os seus recursos enerxéticos e para iso é fundamental poñer fin a esta situación de explotación colonial e reclamar capacidade normativa para poder tomar as decisións referentes a todos os aspectos do desenvolvemento enerxético. En tanto a falta de soberanía política non nos permita desenvolver unha política enerxética propia en todos os aspectos, si é posíbel avanzar progresivamente para establecer medidas que compensen tantos anos de espolio sen recibir nada a cambio. Son decisións políticas que debemos tomar para corrixir un agravio histórico e por xustiza social.

Por todas estas cuestións, é imperativo demandar cambios inmediatos na regulación eléctrica para que a electricidade sexa un servizo básico e estean cubertas as necesidades sociais e económicas dun país coma o noso, tendo en conta que a xeración eléctrica leva aparellados elevados custos sociais e medioambientais que deben sernos compensados.

Neste sentido, unha tarifa eléctrica galega que abarate vía peaxes o prezo final da enerxía no noso país axudaría a democratizar o acceso á enerxía para todas as persoas e, asemade, contribuiría a asentar o tecido industrial e económico do país, frear a deslocalización e evitar a nosa desindustrialización.

Por iso, o grupo municipal do BNG, solicita do Pleno da corporación municipal a adopción do seguinte:

## ACORDO

### Instar á Xunta de Galiza a demandar do Goberno Central

- 1. A inmediata redución do Imposto do valor Engadido sobre a Electricidade do 21% ao 4%.**
- 2. Que exclúa a Galiza da Orde definitiva para a tramitación respecto dos suplementos territoriais para o exercicio 2013, por atentar contra as competencias galegas en materia de tributación ambiental e por seren contrarias para os intereses do tecido social e económico galego, correspondendo ao goberno do Estado asumir os custos que poida ocasionar a aplicación das sentenzas.**
- 3. Modificar a Lei 24/2013, de 26 de decembro, do Sector Eléctrico de forma que se permita a regulación dunha Tarifa Eléctrica Galega que Galiza poida beneficiarse, pola súa condición de nación produtora de enerxía eléctrica, de peaxes más baixas que permitan un abaratamento para os consumos domésticos e empresariais en compensación por soportar os custos sociais e de produción.**

Porto do Son, 24 de outubro de 2018.

Asdo. Ánxela Franco Pouso"

"

A voceira do BNG expón que o contido da moción se resume na frase "quen o traballa, quen xera a enerxía neste caso, que o gañe".

O Sr. Alcalde- Presidente indica que o grupo municipal do PP vai presentar unha emenda á moción que se debaterá e votará; no caso de aprobase, debaterase e votarase a proposta emendada. De seguido, dálle a palabra á voceira do grupo municipal do PP.

Dª. María José Maneiro Quintáns comeza explicando que a factura eléctrica é excesiva e están de acordo co espírito da moción, pero desde o seu grupo propoñen a seguinte emenda transaccional:

- a supresión do punto 2º do acordo, pois hai unha sentenza do Tribunal Supremo que lle impón ao Ministerio de Enerxía o incremento do prezo da enerxía para os consumidores daquelas comunidades autónomas nas que se lle cobren tributos ás compañías eléctricas. En relación con iso, a Xunta de Galicia xa presentou alegacións contra a orde que fixa os suplementos territoriais e solicitou a súa suspensión cautelar mentres non se resolva ese recurso, ao entender que o canon eólico non é un imposto que grave a



actividade eléctrica senón un imposto medioambiental e non pode considerarse un suplemento territorial.

- En relación co punto 3º os argumentos son semellantes e, de querer unha tarifa eléctrica galega, a quen hai que instar é ao Goberno do Estado pois é a quen lle compete regular a tarifa eléctrica, pois o Parlamento galego carece de competencias ao respecto. Recorda que xa no ano 2016 o Parlamento galego acordou por unanimidade acordou por unanimidade admitir a trámite unha iniciativa lexislativa para regular unha tarifa eléctrica galega pero declarouse inconstitucional pois a Lei do sector eléctrico establece unha tarifa única para todo o territorio nacional.

A emenda presentada sería do seguinte teor literal:

"1.- Instar ao Goberno do Estado á redución do IVE sobre a electricidade.

2.- Instar ao Goberno do Estado a modificar a Lei 24/2013, do 26 de decembro, do sector eléctrico, de forma que permita a regulación dunha Tarifa Eléctrica Galega da que Galicia poida beneficiarse pola súa condición de nación produtora de enerxía eléctrica, de peaxes más baixas que permitan un abaratamento para os consumos domésticos e empresariais en compensación por soportar os custos sociais e medioambientais das instalacións de producción."

Dª. Mª Ánxela Franco Pouso pregunta se cabe a presentación de emendas.

O Sr. secretario explica a regulación das emendas no Regulamento orgánico e detalla que "mocións" só son as que se presentan por urxencia, tal e como as define o Regulamento de organización, funcionamento e réxime xurídico das Entidades Locais, e nese caso as emendas só son admisibles se as acepta o propoñente da moción. Engade que as propostas de acordo presentadas polo goberno municipal ou polos grupos políticos poden emendarse.

Dª. Josefa Mª Hermo García di que non ten senso debater a emenda pois esta vai aprobase de todos os xeitos.

Dª. Mª Ánxela Franco Pouso adianta o voto en contra do seu grupo á emenda e di que non lle parece de recibo que a emenda non se presentase onte na comisión informativa.

O Sr. Alcalde- Presidente dá paso á votación da emenda.

O Pleno da Corporación, tras a **votación ordinaria e por sete (7) votos a favor (7 PP) e con seis (6) votos en contra (2 PSdG- PSOE+ 2 Portodos+ 2 BNG)**, polo tanto co **quórum de maioría absoluta**, sendo trece (13) o número legal de membros da Corporación, **APROBA a emenda**.

O Sr. Alcalde- Presidente dá paso ao debate da proposición emendada, indicándolle a súa quenda á voceira do PSdG- PSOE.

Dª. Josefa Mª Hermo García considera que o Pleno non é o foro axeitado para debater sobre este asunto pois trátase de competencias estatais. Continúa indicando que a factura eléctrica é cara pero o Goberno do Estado vén de aprobar un real decreto para tentar abaratala, e explica que as opcións eran dúas: seguir lamentando o custo dunha factura eléctrica lesiva ou adoptar medidas; engade que se optou pola segunda vía, eliminando o "imposto ao sol", renovando o "bono social" e apoiando o autoconsumo eléctrico, algo co que o PP non estaba de acordo.

Conclúe a súa intervención sinalando que, con independencia de que estea de acordo ou non coa moción, rexeita rotundamente a moción emendada pola maioría do PP.

Dª. Mª Ánxela Franco Pouso di que está farta de que se bote man da Constitución para xustificar as cousas e que se aluda a ela como un “libro sacro” que non pode tocarse, aínda que logo, co acordo do PP e do PSOE, se mude cando interesa para pagar as débedas con Europa.

Aludindo ao manifestado pola Sra. Hermo García, sinala que, con independencia de que este sexa ou non o foro axeitado, o certo é que a electricidade ten un IVE do 21 %, como se fose un ben de luxo.

A Sra. Franco Pouso continúa afirmando que non entende porque os galegos, que somos produtores de electricidade, temos que pagar máis pola luz; é Galicia, continúa, quen ten os ríos e os montes estragados cos embalses e os muíños eólicos. Se Galicia produce electricidade, prosegue, os galegos temos dereito a pagar menos por ela pero, pola contra, temos a tarifa máis cara. Continúa sostendo que os territorios nos que se produce electricidade deberían obter algún beneficio diso e que non sabe porque os galegos son tan sumisos que non loitan por unha tarifa eléctrica propia cando noutras zonas do Estado, por riba, teñen unha tarifa máis baixa.

Dª. María José Maneiro Quintáns expresa o seu pleno acordo coas afirmacións de que a tarifa eléctrica é moi cara e con que o Pleno non é o foro axeitado para debater esta cuestión.

En referencia ao manifestado pola voceira socialista, a Sra. Maneiro Quintáns di que lle chama a atención que se gabe a política enerxética dos gobernos socialistas cando durante o seu mandato se multiplicou por 10 o déficit da tarifa eléctrica. Apunta que ningún partido pode presumir e todos teñen que facer autocrítica neste asunto pois o resultado está á vista cando se mira o recibo da luz. Considera que todos os partidos deberían xuntarse para mellorar a tarifa eléctrica e, tal vez, unha primeira medida podería ser a rebaixa do IVE.

A Sra. Maneiro Quintáns di que lle gustaría pagar menos pola electricidade pero cre que é difícil pois viven nun estado igualitario e hai leis que son constitucionais e deben aplicarse. Por este motivo, cre que é difícil que prosperen as medidas para diferenciar tarifas entre as comunidades autónomas e recorda que xa se tentou no 2016 e se declarou inconstitucional.

Dª. Josefa Mª Hermo García sinala que o PP gobernou desde o 2011 ata o 2018 e durante ese período tivo tempo de mudar a política enerxética dos gobernos socialistas, polo que non comprende por que non o fixo.

Dª. Mª Ánxela Franco Pouso di que ela é unha nacionalista galega pero mentres pague impostos é tan española como os do PP. Tamén pregunta se recordan o debuxo de Castelao no que un paisano muxe a vaca pero bebe o leite outro; afirma que non quere que Galicia sexa coma a vaca.

A Sra. Franco Pouso manifesta que as empresas enerxéticas estragaron os ríos e os montes galegos pero levaron as súas oficinas e pagan os seus impostos en Madrid. Tamén recorda que Bruxelas autorizou a rebaixa da tarifa eléctrica para o País Vasco.

Conclúe a súa intervención pedindo que se aclare se se vai votar a moción do BNG ou a que foi emendada.

O Sr. Alcalde- Presidente explica que se vai votar a moción coa emenda que se aprobou pola maioría dos concelleiros.



Non habendo máis intervencións, o Sr. Alcalde- Presidente dá paso á votación da proposta.

O Pleno da Corporación, tras a **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co quórum de maioria absoluta, sendo trece (13) o número legal de membros da Corporación, **APROBA a seguinte proposta emendada:**

"1.- Instar ao Goberno do Estado á redución do IVE sobre a electricidade.

2.- Instar ao Goberno do Estado a modificar a Lei 24/2013, do 26 de decembro, do sector eléctrico, de forma que permita a regulación dunha Tarifa Eléctrica Galega da que Galicia poida beneficiarse pola súa condición de nación produtora de enerxía eléctrica, de peaxes más baixas que permitan un abaratamento para os consumos domésticos e empresariais en compensación por soportar os custos sociais e medioambientais das instalacións de producción."

## **5. MOCIÓN DO GRUPO MUNICIPAL DO BNG EN APOIO AOS TRABALLADORES DE ALCOA.**

D. David Barrio Alonso le o texto da moción, que é do seguinte teor literal:

**"MOCIÓN EN APOIO AOS TRABALLADORES E TRABALLADORAS DE ALCOA DEMANDANDO SOLUCIÓN AO ANUNCIADO PECHE**

### **EXPOSICIÓN DE MOTIVOS**

O pasado 17 de outubro a empresa Alcoa comunicou aos cadros de persoal así como publicamente a súa intención de pechar as instalacións da empresa na Coruña.

O grupo conta na Coruña con preto de 400 traballadores e traballadoras, polo que a consumación do peche tería un enorme impacto na cidade e na súa contorna, ademais de contribuír á perda de tecido industrial en Galiza.

Unha das razóns fundamentais do peche vén sendo o prezo da factura da luz, que supón máis do 40% dos custos de produción. Unha evidencia máis de que a defensa que fai o nacionalismo da necesidade de mudar o sistema de poxas de interrompibilidade por un marco más estábel, demanda tamén do propio sector electrointensivo, así como promover unha tarifa eléctrica galega que dea vantaxes competitivas ás empresas radicadas no noso país, están de extrema actualidade. Poñer solución a esta crise e aos graves problemas que supón o marco eléctrico por inestábel e polo constante incremento do prezo depende de decisións políticas.

Por iso, o grupo municipal do BNG solicita do Pleno da Corporación municipal a adopción do Seguinte

### **ACORDO**

**1. Expressar o apoio aos traballadores e traballadoras de Alcoa e ás súas mobilizacións.**

  
**2. Demandar da Xunta de Galiza a realización de todas as accións necesarias encamiñadas a garantir os centros produtivos e os postos de traballo de Alcoa en Galiza, a comezar por:**

- a) **Solicitar inmediatamente da multinacional a retirada do ERE de extinción de emprego.**
- b) **Promover a constitución dunha mesa de negociación para loitar pola continuidade da empresa na que se dea participación ao cadro de persoal, entidades sociais e administracións comprometidas coa súa permanencia.**
- c) **Negociar co goberno central un marco enerxético estable para a industria do noso país que permita unha tarifa eléctrica galega que mellore a nosa competitividade por sermos produtores de enerxía, contribuíndo ao abaratamento da factura destas industrias baixo o cumprimento dunha serie de compromisos de investimento e mantemento dos postos de traballo.**

Porto do Son, 24 de outubro de 2018.  
Asdo. Ánxela Franco Pouso"

O Sr. Alcalde- Presidente dá conta de que na comisión informativa se presentou unha emenda, e dálle a palabra a Dª. María José Maneiro Quintáns para que a lea.

A Sra. Maneiro Quintáns le a emenda, que é do seguinte teor literal:

"O Concello de Porto do Son insta á Xunta de Galicia a que requira do Goberno do Estado:

1. Que poña en marcha e antes da finalización da anualidade orzamentaria 2018 as compensacións previstas na disposición adicional centésima cuadraxésima quinta da Lei 6/2018, do 3 de xullo, de Orzamentos Xerais do Estado para o ano 2018 por importe de 150 millóns de euros. Estas compensacións deberán estar condicionadas a inversíons para viabilidade tecnolóxica futura das factorías e o mantemento do emprego.
2. Que, para o exercicio 2019 e seguintes, se implante un novo réxime de compensación por custos adicionais incluídos no prezo da electricidade soportados polas industrias electro- intensivas. Estas compensacións deberán estar condicionadas a inversíons para a viabilidade tecnolóxica futura das factorías e o mantemento do emprego.
3. Que para os anos sucesivos se establezan todos os mecanismos de compensación necesarios, previo acordo coas Comunidades Autónomas afectadas, para que este tipo de industrias compitan en igualdade de condicións coas súas homólogas europeas. Estas compensacións deberán estar condicionadas a inversíons para a viabilidade tecnolóxica futura das factorías e o mantemento do emprego.
4. Demandar á empresa Alcoa a súa reconsideración e retirada do expediente de extinción de emprego sobre a totalidade da plantilla na súa factoría de A Coruña, tentando buscar solucións entre todos os axentes políticos, económicos e sociais afectados, e a abrir unha mesa de negociación con todas as partes implicadas para buscar unha solución. Solucións que teñen que presentar liñas de actuación adecuadas e de futuro que garantan o mantemento da produción e o emprego na factoría de A Coruña".

A voceira do PP explica que a emenda recolle a proposta aprobada por unanimidade no Parlamento Galego o 23/10/2018.

D. David Barrio Alonso apunta que o seu grupo vai votar en contra de todo o que sexa deformar a súa moción e indica que únicamente está de acordo co punto 4 da emenda.



Non habendo máis intervencións o Sr. Alcalde- Presidente dá paso á votación da emenda.

O Pleno da Corporación, tras a votación ordinaria e por sete (7) votos a favor (7 PP), con dous (2) votos en contra (2 BNG) e con catro (4) abstencións (2 PSdG- PSOE+ 2 Portodos), polo tanto co quórum de maioría absoluta, sendo trece (13) o número legal de membros da Corporación, APROBA a emenda.

O Sr. Alcalde- Presidente dá paso ao debate da proposición emendada, indicándolle a súa quenda á voceira do PSdG- PSOE.

Dª. Josefa Mª Hermo García afirma que o prioritario é que Alcoa non peche nin a factoría da Coruña nin a de Avilés e que é importante que a multinacional americana sinta a unanimidade de todas as siglas demandando que se retracte do expediente de regulación de emprego (ERE). Todos os representantes políticos, di, teñen que estar unidos na defensa dos postos de traballo.

D. David Barrio Alonso recorda que as factorías de Alcoa pertencían antes a unha empresa pública, que se privatizou na época do Sr. Aznar, e que semella que se deixou esmorecer.

Dª. María José Maneiro Quintáns sostén que non hai que buscar culpables da actual situación das factorías de Alcoa senón solucións para os empregados que están a piques de perder os seus postos de traballo. Na súa opinión, conduciu a esta situación o elevado custo da enerxía eléctrica polo que todos deben loitar para que esos custos diminúan e se poidan coñecer con antelación. Tamén reitera que a emenda aprobada non é unha emenda do PP senón un acordo unánime do Parlamento galego.

A Sra. Maneiro Quintáns opina que Alcoa está agardando a que se execute a partida de 150 millóns de euros dos Orzamentos Xerais do Estado consignada para compensar os custos de interrupcibilidade eléctrica e cre que deben loitar por rebaixar os custos da electricidade para as empresas que teñen unha alta dependencia deses custos.

D. David Barrio Alonso afirma que, ao cabo de todo, a solución é a que propuxo o BNG: a tarifa eléctrica galega. Tamén di que non entende que, neste asunto, non se busquen culpables.

Non habendo máis intervencións, o Sr. Alcalde- Presidente dá paso á votación da proposta.

O Pleno da Corporación, tras a votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG), polo tanto co quórum de maioría absoluta, sendo trece (13) o número legal de membros da Corporación, APROBA a seguinte proposta emendada:

"O Concello de Porto do Son insta á Xunta de Galicia a que requira do Goberno do Estado:

1. Que poña en marcha e antes da finalización da anualidade orzamentaria 2018 as compensacións previstas na disposición adicional centésima cuadraxésima quinta da Lei 6/2018, do 3 de xullo, de Orzamentos Xerais do Estado para o ano 2018 por importe de 150 millóns de euros. Estas compensacións deberán estar condicionadas a inversións para viabilidade tecnolóxica futura das factorías e o mantemento do emprego.

2. Que, para o exercicio 2019 e seguintes, se implante un novo réxime de compensación por custos adicionais incluídos no prezo da electricidade soportados polas industrias electro-intensivas. Estas compensacións deberán estar condicionadas a inversións para a viabilidade tecnolóxica futura das factorías e o mantemento do emprego.

3. Que para os anos sucesivos se establezan todos os mecanismos de compensación necesarios, previo acordo coas Comunidades Autónomas afectadas, para que este tipo de industrias compitan en igualdade de condicións coas súas homólogas europeas. Estas compensacións deberán estar condicionadas a inversións para a viabilidade tecnolóxica futura das factorías e o mantemento do emprego.

4. Demandar á empresa Alcoa a súa reconsideración e retirada do expediente de extinción de emprego sobre a totalidade da plantilla na súa factoría de A Coruña, tentando buscar solucións entre todos os axentes políticos, económicos e sociais afectados, e a abrir unha mesa de negociación con todas as partes implicadas para buscar unha solución. Solucións que teñen que presentar liñas de actuación adecuadas e de futuro que garantan o mantemento da producción e o emprego na factoría de A Coruña”.

Dª. Mª Ánxela Franco Pouso pide que conste na acta que o seu grupo se abstivo na votación pola fórmula estraña para tratar as emendas ás propostas.

## **6. MOCIÓN URXENTES.**

Dª. Josefa Mª Hermo García anuncia a presentación dunha moción urgente relacionada co día 25 de novembro. Engade que pode substituírse por unha declaración institucional se o acordan e tamén facer un receso para valorar esta opción.

O Sr. Alcalde- Presidente pregunta se a moción urgente que quere presentar o BNG vai na liña da do PSdG-PSOE.

Dª. Mª Ánxela Franco Pouso responde que si e que por cuestións de tempo non a presentaron por rexistro. Tamén apunta que sería bo facer unha declaración institucional.

O Sr. Alcalde- Presidente pídelle á Sra. Hermo García que lea a moción e despois farán un receso para tentar consensuar unha declaración conxunta.

Dª. Josefa Mª Hermo García le o texto da moción.

Tras a lectura, o Sr. Alcalde- Presidente dispón un receso na sesión sendo, aproximadamente, as 21:10 horas. Contra as 21:15 horas retómase a sesión.

Fai uso da palabra Dª. Josefa Mª Hermo García quen explica que se muda o punto 3º dos acordos da moción, substituíndo pola frase “instar ao Goberno do Estado a tramitar os Orzamentos Xerais do Estado para 2019”.

D. José Ángel Lorenzo Vila intervén para manifestar que cada vez que se trata o tema da violencia de xénero, este se debía abordar como tal, pero el non sabe se a expresión “violencia de xénero” comprende só a que se exerce contra as mulleres ou tamén a que recae sobre os homes. Sinala que el condena todo tipo de violencia pero en Porto do Son, recentemente, deuse un caso que lle afectou a un home e que el seguiu moi de preto.



Dª. Josefa Mª Hermo García sinala que a violencia sobre as mulleres se denomina "violencia de xénero", mentres que cando afecta aos homes é "violencia doméstica".

Dª. Mª Ánxela Franco Pouso indica que a proposta que van debater fai referencia ao 25 de novembro, relativo á violencia sobre as mulleres.

D. José Ángel Lorenzo Vila apunta que xa case van 4 anos de mandato da Corporación e o tema da violencia contra os homes non se abordou. Afirma que os homes tamén sufren violencia, aínda que tal vez máis de natureza psicolóxica. Engade que o tema da violencia se aborda sempre polo mesmo lado e el está descolocado.

Dª. Mª Ánxela Franco Pouso sinala que os actos do 25 de novembro se refiren á violencia contra as mulleres. En relación co manifestado polo Sr. Lorenzo Vila, ínsta a que presente unha moción, e considera que todos os grupos o apoiarían.

Dª. María José Maneiro Quintáns intervén para ler a definición de "violencia de xénero" que dá a Wikipedia e D. Luis García Gaciño le a definición do mesmo concepto que dá a páxina web da Xunta de Galicia e que se refire á violencia sobre as mulleres.

O Sr. Alcalde- Presidente indica que os actos do 25 de novembro se refiren más ben á violencia que padecen as mulleres, pero tamén está de acordo co manifestado polo Sr. Lorenzo Vila.

Dª. Josefa Mª Hermo García di que a violencia sobre as mulleres é un tema moi serio que no concello deu lugar, incluso, a mortes. Engade que se debe facer un labor de prevención e educación, concienciando aos nenos ou facendo talleres, por exemplo. Ao respecto, sinala que no concello se detectaron casos de "sexting", o que pon de relevo a necesidade imperiosa de loitar contra esa lacra e de artellar medidas de prevención.

Dª. Mª Ánxela Franco Pouso afirma que a violencia de xénero non será erradicada se non se loita contra ela desde a primeira infancia. Aproveita, tamén, para instar ao goberno municipal a que o Concello de Porto do Son se sume á campaña da Deputación Provincial "En negro" que, ademais, non ten custo. Conclúe a súa intervención acordándose dos nenos que padecen esas situacions de violencia e reiterando a importancia da educación como medio de prevención da violencia de xénero.

Non habendo mais intervencións, o Sr. Alcalde- Presidente dá paso á votación da proposta.

O Pleno da Corporación, tras a votación ordinaria e por nove (9) votos a favor (7 PP+ 2 BNG) e con catro (4) abstencións (2 PSdG- PSOE+ 2 Portodos), polo tanto co quórum de maioria absoluta, sendo trece (13) o número legal de membros da Corporación, APROBA a seguinte declaración institucional:

#### "DECLARACIÓN INSTITUCIONAL

O Concello de Porto do Son aproba:

1º.- Que o Goberno continúe impulsando as medidas recollidas no Pacto de Estado contra a Violencia de Xénero nos ámbitos educativo, social, xurídico, económico, de protección, de concienciación e de sensibilización social.

2º.- Instar ás Cortes Xerais a axilizar todos os cambios lexislativos impulsados polo Goberno para poder aplicar as medidas contidas no Pacto de Estado contra a Violencia de Xénero o máis axiña posible.

3º.- Instar ao Goberno do Estado a tramitar os Orzamentos Xerais de 2019, que suporán un incremento das partidas destinadas ás Comunidades Autónomas e aos Concellos para loitar contra a violencia de xénero.

4º.- Que o Goberno inste os medios de comunicación a evitar aqueles contidos que transmitan un estereotipo de relacións de parella baseado en comportamentos machistas.

5º.- Dar traslado desta declaración e da súa aprobación ao Presidente do Goberno, á Vicepresidenta do Goberno e Ministra de Presidencia, Relacións coas Cortes e Igualdade e ao Presidente da Federación Española de Municipios e Provincias."

## **7. DACIÓN DE CONTA DE DECRETOS E ACTAS DA XUNTA DE GOBERNO LOCAL.**

O Sr. Alcalde- Presidente dá conta dos decretos da Alcaldía dos núms. 648/2018 ao 754/2018 e das actas da Xunta de Goberno Local do 31 de agosto, 21 de setembro e 4 e 18 de outubro de 2018.

## **8. ROGOS E PREGUNTAS.**

D. José Manuel Deán Pouso resposto ás preguntas formuladas na anterior sesión ordinaria do Pleno e que non foron contestadas nesa mesma sesión.

a) Preguntas de D<sup>a</sup>. Josefa M<sup>a</sup> Hermo García:

1/ ¿En que termos se está cumplindo, aplicando ou levando a cabo o Plan Xeral?

No Concello de Porto do Son aplícase o Plan Xeral , total e integralmente dende a súa entrada en vigor.

2/ ¿De cantas denuncias ten constancia o Sr. Alcalde en relación coa non aplicación do Plan Xeral?

Entendemos que se refire a denuncias por infraccións urbanísticas, no último ano pode haber arredor de doce. Ademais de expedientes abertos por denuncias de particulares, o concello fai labor de inspección urbanística a través da policía local e servizos técnicos que teñen un alcance moi superior.

b) Preguntas de D. Luis García Gaciño:

1/ ¿Está vixente a Ordenanza fiscal reguladora da taxa por postos, barracas, casetas de venda, espectáculos ou atraccións situadas no terreo de uso público e industrias ambulantes e rodaxe cinematográfica?

Si, desde a súa publicación definitiva no BOP o 17 de xaneiro deste ano.



2/ O art. 15 da Ordenanza reguladora do uso das praias, sobre a que o grupo socialista presentou unha moción, prohíbe o acceso de animais ás zonas de baño e cualifica como infracción grave a tenza de animais, ¿hai unha contradición? ¿Pode establecerse un espazo ou horario no que esa conduta non sexa sancionable?

O acceso de animais ós areais está regulado na ordenanza municipal de policía e bo governo, que nos seus artigos 50 e 51 regula o seguinte:

*"Artigo 50. Apartado 5. Está prohibido o acceso aos areais con animais de compañía en Semana Santa, e nos meses de maio a setembro, ambos incluídos. No resto do ano, tampoco se permitirá o acceso aos areais siempre que nos mismos se estea desenvolvendo algún tipo de actividade organizada que implique unha concentración ou afluencia de persoas.*

*Artigo 51. Apartado 2. . O incumplimento do disposto no apartado 4 e 5 do antedito artigo será unha INFRACCIÓN LEVE e será sancionada con multa de 50,00 a 750,00 €".*

Coa regulación actual, a excepción do exposto anteriormente, está permitido a tenencia de animais nos areais, e polo tanto non será sancionable.

c) Preguntas de Dª. María Ánxela Franco Pouso:

1/ ¿Cando vai aprobar o Consello da Xunta o proxecto da "fachada marítima"? ¿Daranllles unha copia para estudar como afectará aos veciños?

Unicamente falta o informe favorable de Estradas e a previsión é levalo ao Consello da Xunta este mes de novembro.

2/ ¿Cal é o motivo polo que se elaborou un Plan de Subvencións no que non se recollen todas as festas do concello?

No plan recóllense todas as festas sen excepción.

3/ ¿Vaise considerar unha subvención o uso de locais municipais por organizacións ou entidades?

O uso de locais non é unha subvención.

4/ ¿Cando se lle vai entregar á Garda Civil o edificio da antiga Cámara Agraria?

Cando finalice o trámite de adquisición, cederase para uso da Garda Civil.

5/ ¿Van cumplir o que lle prometeron ao Club de Xubilados de Portosín?

En Portosín non hai club de xubilados, e non sabemos a que se refire.

6/ Insta a que se aclare a situación da radio municipal: ¿hai convenio ou non? ¿Está en situación irregular ou non? ¿Por que non se lle dá conta ao Pleno?

Estas preguntas xa foron respostadas en múltiples ocasións.

7/ ¿Non viron as árbores queimadas a punto de caer no parque infantil ou como están as cortizas? ¿Como é que instalaron unha grella a carón do parque infantil?

O concello instalou un asador a petición do Club de Xubilados de Caamaño.

d) Preguntas de D. David Barrio Alonso:

1/ ¿Cando pensa o concello cumplir a súa promesa e arranxar o hórreo situado xunto á igrexa de Xuño?

O que se dixo é que o concello se faría cargo do arranxo do hórreo no caso de que fose cedido como ben público municipal. Mientras isto non se produza, o arranxo corresponde á Igrexa, titular do ben.

2/ Patrimonio levou fai tempo, para restaurar, a imaxe do cruceiro situado xunto á estrada xeral en Portosín. ¿Que sucedeu coa imaxe, pois leva 7 anos desaparecida?

Segundo informacions do párroco de Portosín, a imaxe rompeu tras un accidente acontecido no lugar e actualmente está nas instalacions da Policía Autonómica en Santiago. Desde a parroquia xa se están a facer as xestións oportunas para recuperar a imaxe.

3/ ¿Está pechada a compra dos terreos para a EDAR de Queiruga?

Están os contratos firmados e restaría facer o pago.

5/ ¿Cando se ten pensado comenzar a obra da glorieta de Portosín?

A obra xa está adxudicada, polo tanto comenzarán as obras nas próximas datas.

A continuación, o Sr. Deán Pouso contesta as preguntas formuladas por escrito e rexistradas de entrada o 05/11/2018 por D. Luis García Gaciño:

1/ ¿Porqué non se están a celebrar de forma ordinaria as Xuntas de Concelleiros Delegados durante o ano 2018? ¿Considera o equipo de goberno que xa non é un órgano útil?

Facémolas cando o consideramos necesario e oportuno.

2/ En relación ao paseo marítimo entre a vila do Son e a praia de Cabeiro, ¿que xestións ou reunións fixo o equipo de goberno local para materializar este acordo plenario? ¿En qué fase está o proxecto a día de hoxe?

Desde o Concello fixérónse tódalas xestións necesarias e celebráronse varias reunións con D. Rafael Eimil, responsable de Costas do Estado, para concretar o proxecto e esperamos que se materialice no menor tempo posible, se ben somos conscientes que depende duns Orzamentos Xerais do Estado que non teñen visos de ser aprobados.

3/ ¿Cales son as fórmulas ou opcións que está barallando o equipo de goberno para limitar o acceso masivo de visitantes ao Castro de Baroña?



O Castro de Baroña é un espazo aberto que non se pode acutar, polo tanto o único que se pode facer é aumentar a vixilancia e facer labor de concienciación.

4/ ¿En qué fase de execución está o Plan de Accesibilidade elaborado por COGAMI para o Concello de Porto do Son? ¿Qué plans concretos de organismos provinciais, autonómicos, estatais ou europeos se están a barallar para financiar as obras necesarias? ¿Cales son as 5 actuacións que o Goberno local considera más prioritarias deste Plan de Accesibilidade?

Agora mesmo, estamos concluíndo as obras da primeira fase dese Plan de Accesibilidade, obras finanziadas pola Xunta de Galicia, Consellería de Política Social.

A nosa intención, é abordar cada ano unha nova fase do plan ata a súa conclusión.

O documento está a disposición no Xoncello, e no mesmo se recollen tódalas actuacións por orden de prioridade segundo criterios absolutamente técnicos e de accesibilidade.

5/ ¿E posible que haxa facturas por revisión de extintores dun inmoble como a antiga escola de Carballosa que leva anos en situación ruinosa e se vai a derrubar?

É posible que haxa facturas de revisión de extintores das escolas de Lapido e Seráns. Resulta evidente que na escola en ruínas de Carballosa non hai extintores que revisar.

\*\*\*\*\*

a) Dª. Josefa Mª Hermo García fai os seguintes rogos e preguntas:

1/ Na sesión extraordinaria do 31 de outubro pasado aprobouse unha factura de case 500 euros polo concepto "mantemento da "app" do concello", ¿analizouse o rendemento desa aplicación?

b) D. Luis García Gaciño fai os seguintes rogos e preguntas:

1/ ¿En que situación se atopa o empedrado da Rúa Atalaia? ¿Como vai actuar o concello coa empresa adxudicataria para que se lle ocasione os menores inconvenientes ao concello?

c) D. José Ángel Lorenzo Vila fai os seguintes rogos e preguntas:

1/ Onte puideron ver nun programa de televisión o pésmo servizo de cátering que presta unha empresa privada no hospital do Barbanza; dado que hai veciños de Porto do Son que son afectados dese servizo, ¿o goberno municipal vai realizar algúna actuación ao respecto? ¿Vaise mediaralgún xeito para mellorar a calidade dese servizo que lles afecta a todos?

d) Dª. Mª Asunción Torres Parada fai os seguintes rogos e preguntas:

1/ ¿Fíxose algún estudo para coñecer os posibles danos á saúde dos veciños do Son causados pola radiación emitida pola antena situada no casco urbano da vila? ¿Habería a posibilidade de retirar esa antena ou alonxala das vivendas?

2/ Os cans abandonados ou extraviados que son levados ás instalacións municipais, ¿dispoñen por fin de canis e zonas nas que poder estar soltos e libres de cadeas tal e como xa solicitaron en plenos anteriores?

3/ Roga que se arranxe a pista deportiva e área recreativa da aldea de Alboreda.

4/ ¿Ten previsto o goberno municipal cumplir a súa vella promesa electoral de facer un polígono industrial?

e) Dª. Mª Ánxela Franco Pouso fai os seguintes rogos e preguntas:

1/ ¿Sería posible que entre os gastos aprobados na sesión extraordinaria pasada se poidan incluír os motores da foxa séptica situada xunto ao Centro de Día, posto que están á intemperie? A caseta na que están situados leva tirada unha chea de anos.

2/ ¿Incluíuse nas obras de mellora de pistas aprobadas na sesión anterior o arranxo da pista que vai desde o lugar do Campo á igrexa de Caamaño?

3/ ¿Como vai a compra da futura casa do concello?

4/ ¿Asinouse ou pechouse definitivamente o convenio coa Comunidade de Montes de San Pedro de Muro sobre a situación irregular da casa da cultura?

5/ ¿Cando van reparar o camiño da Fieitosa en Caamaño?

6/ En relación coa solicitude que fixo na sesión anterior para que se continuase co Inventario de Bens e logo de ver nas actas da Xunta de Goberno Local que había un debate entre dous veciños de Caamaño acerca de se era ou non un camiño público, agora están vendo que o concello está a arranxar ese camiño. ¿Aclarouse se o camiño é público ou privado? ¿Aclarouno o xulgado ou fixoo o concello?

O Sr. Alcalde- Presidente intervén para indicar que se trata dun camiño público e pídelle á voceira do BNG que non confunda a pista asfaltada na que se traballa cun suposto camiño que discorría por unhas leiras.

7/ ¿Solicitóuselle autorización aos propietarios das leiras polas que pasaron as máquinas como se fosen públicas e puidesen valerse das prerrogativas que lles dá a lei?

8/ ¿A que responde que se levantasen as beirarrúas na estrada xeral, na zona do Outeiro, e se empedren? ¿Por que se fai esa obra? ¿Atende a unha necesidade especial?

O Sr. Alcalde- Presidente responde que se trata das obras de accesibilidade das que se falou fai pouco.

A Sra. Franco Pouso aclara que preguntaba porque nesa zona a pedra criaba moito verdín e, ademais, non lle parece que teña moita lóxica unha obra na que se mesturan plaqeta e pedra.

f) D. David Barrio Alonso fai os seguintes rogos e preguntas:

1/ ¿A obra da Rúa Atalaia está xudicializada?



2/ ¿Ten o concello pensado tomar algunha medida coas palmeiras existentes a carón da estrada xeral en Xuño?

3/ ¿En que consiste o estudo para compatibilizar o turismo coa natureza que parece ser que o goberno municipal e a Sra. Ánxelos Vázquez están prantexando?

4/ ¿Que medidas ten pensado adoptar o goberno municipal no cruce da piscina pois xa houbo 3 accidentes en poucos meses?

Dª. Mª Ánxela Franco Pouso fai uso da palabra para rogar que lles remita por correo a documentación das sesións mentres non dispoñan de certificado dixital.

O Sr. secretario explica que co certificado dixital persoal poderán acceder telematicamente á documentación do Pleno picando no enlace que se lles remite coa convocatoria electrónica, e indica que, de todos os xeitos, remitiron tamén por correo electrónico a documentación escaneada.

E non habendo máis asuntos que tratar, de orde da Alcaldía- Presidencia, levántase a sesión, sendo as **21:50 horas** do día **8 de novembro de 2018**, de todo o que se estende a presente acta, da que eu, como secretario dou fe.

O ALCALDE-PRESIDENTE.

Asdo. José Luis Oujo Pouso.

O SECRETARIO que dá fe.

Asdo. José Manuel González García.\*

